



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tir\_yimyim

tir yimyim TAPAK 8



Miami Open: Alcaraz, Sabalenka  
nati takok nguogo **miami open**

PM Modi-i Iran Tir Masoud den  
"West Asia tensa atema jembi

VOL. XXIII ISSUE NO. 158 (ADOK 158) DIMAPUR AMUNGNÜ (SUNDAY) METSÜREMI (MARCH) 22, 2026 ₹ 5.00

## NPP-i Nuklutoshi nem show cause notice agütsür

**Dimapur, March 21, 2026 (TYO):** NPP Nagaland Legislative Party Leader, Nuklutoshi Longkumer-i party inyakyim alema inyakba atema National People's Party (NPP)-i pa nem show-cause notice ka agütsüogo.

28-Koridang by-election atema NPP-i I Abenjang parnok tenüng nung tokteptsü shimtet saka iba ya NPP Nagaland unit-i magizüker.

"MLA Nuklutoshi-i Koridang Assembly by-election nung party-

i shimtetba candidate anema jembio. NPP MLA ajaki party official lemtetem sülen anidaksüla" ta NPP National General Secretary (Organisation), Paknga Bage-i ashi.

NPP-i MLA Nuklutoshi nem anogo tenet tsüngda telangzüba agütsütsü mapang züngzüksüogo.

MLA Nuklutoshi-i iba telangzüba magütsü tashi yimjak nung o mejembitsü mesüra party tetuyuba alema meinyaktsü metetdaksüogo.

## Longkhum nungl. Abenjang pelashishia agizük

**Dimapur, March 21, 2026 (TYO):** Longkhum nungeri 28-Koridang Assembly Constituency by-election nung National People's Party (NPP) candidate I. Abenjang pelashishia agizükogo.

Honibarnü NPP candidate Abenjang-i par tasoyim Longkhum semdang aser idangji Longkhum Village Council Chairman-i anir yimsüsürtem, taintem, pusemertem aser temeimer aika adenshir pa pelaa agizük.

NPP National Vice President Vevoyi Wideo, NPP National People's Women Front President Smt. Ane-ii Khaming na den party lennir tejentem aser züngsemtemi Abenjang meina

liasü. "Nübertemi ni pusema nungitba atema pelar. Asenoki meyipa agitsü mapang tongogo aser asenok mejanga aliba saaktsüla" ta Abenjang-i ashi.

Paisa Koridang constituency ajungtsü, longjemtsü aser tejakleni aotsü atema anibelem arema inyaktsü nangzük.

Abenjang ya bendanga agütsüba lennir ka lir aser pai tebilemstütem kanga junga angateta lir ta NPP National Vice President Wideo-i ashi.

Longkhum nunger aser Koridang constituency nung alirtemi I. Abenjang pusema nungittsü ayongzükker ta paisa ashi.

## Congress-i T Chalukumba nem ticket agütsür

**Kohima, March 21, 2026 (TYO):** 28-Koridang Assembly Constituency by-election atema Congress T Chalukumba Ao nem party ticket agütsüogo.

Nagaland Pradesh Congress Committee (NPCC)-i ashiba sülen All India Congress Committee president Mallikarjun Kharge-i T Chalukumba Ao nem party ticket agütsütsü mulunga agizük.

Honibar nikongdang

Congress Bhavan nung NPCC president aser Lok Sabha MP S Supongmeren Jamir-i Chalukumba nem Congress ticket agütsü. Iba mapang NPCC working president ana- Khriedi Theunuo aser C. Apok Jamir na liasü.

Koridang assembly nung April 9 nü by-election agitsü. MLA & Advisor Imkong L. Imchen asüba ajanga by-election agitsüsa akümer.

## Koridang Bye-election nüngtem nung shisalem sentong ka agi



Aor Kilem nung Koridang Constituency nungi yimsüsür aser lenirtem den mensem agir külen Ao Senden lenirtem aser ABAM lenirtem külemi tangokba noksa.

**Mokokchung, Metsüremi/ March 21 (TYO):** Ao Senden-i ayongzüka Aor Kilem Mokokchung nung tang aruya aliba 28 Koridang Assembly Constituency nung Bye-election agitsüba dak rangloker "Election Merükteta Agitsü Nükla Mensem" ka kaogo.

Tanü iba sentong nung Longkhum, Alichen, Mangmetong, Satsü, Khensa, Yimyu, Meküli, Chungtia, Aliba, Kinunger, Longjongkong nungi yimsüsürtem arua dena liasü.

Tanü iba sentong nung Ao Senden tenüng nung Tir Wb. Marsanen Imsong-i jembidang iba mensem ya Koridang nungeri shimteta lenir MLA Imkong L. Imchen asüba ajanga pa melena lenir shimtetsü asoshi Bye-election agitsü aliba nüngtem nung ayongzükba lir. Iba mensem sentong akaba ajanga election ajanga teraksa masü saka teyanglushiba ka aginüba ajanga ayongba lir ta ashi.

Clean Election ya election inyakyim yanglushitsü asoshi lir saka mapa mekümteter asünung iba melena ya People's Clean Election ta melentsüla aser ibaji ajanga nüburttem tangatetba melenshir election nung tim masübatem meinyaktsü nüngdaker, election ajanga teraksa bener arur ta jembir, süra temelenshi tajung ka

arudaktsütsü asoshi shibai anir inyaktsü, tanü adenshia aliba yimsüsür aser lenirtemi anir inyaktsüla ta Marsanen-isa ayongzüka jembi.

Ao Senden-i temzüng ozüng ka yanglutsü asoshi iba mensem ya jazükba masü saka iba Koridang Bye -election nung temelenshi adoka tajungleni odaktsütsü lemsateptsü jazükba lir ta Ao Senden Tir-isa ashi. Clean Election-ji Ao kini tenzükanungji tang Koridang Bye-election nungi tenzüka Ao Lima nung pei sasa pei vote agütsü tenzüki. Tang Bye-election nungi sen alemba, yi alemba, Miim-mozü alemba aser tim masüba inyakbatem anendaktsüdi, Koridang nung tang Bye-election agiba nung temelen adokba ajanga Ao kin temoatsü agidi ta Ao Senden Tir-isa lemsatep.

Sentong nungsa Ao Baptist Arogo Mungdang Executive Secretary Rev. Tamsü Jamir-i jembidang election merüka agitsü asoshi Aori Clean Election tenzüka saka asenok election mapang nung mesüngjemteter, tangar kinbo asenok dang nungi angazükker kanga jung benshiteter, Ao lima nung election agiba indang jembira o tamajung dang jembitsüsa akümer ta ashi.

Executive Secretary-isa Ao lima nung joko election nung sen aser yi alema, sübokrem

amshiba, Vote aliba, vote ayokba, coup asüba ajak ya pongpa pongpa dang agir aser yimya ka ama dang kümogo, Naga lima nung election agiba mapang nung Ao Lima nung dang taküm samar saka tangarbo mesamar, tangar dang kanga dang akseta bilemer ta lemsatep.

Ongpangkong Mungdang Tir Wb. Alemtoshi Imsong-ia tajungshi o jembidang alima raksatsü aser yanglutsü yimsüsür dak tuluka keta lir, anungji tang aruya aliba Bye-election nung ya tajung ka pokteta inyaktetsü asoshi yimsüsürtem tasü aittsüla ta ayongzüka jembi.

Ao lima lima election nung yimer den madenerbo ki shibangtsür aser yim nungi jentoker, iba yabo melenshitsüla kechiaser iba ya asen sobaliba nung mali ta Ongpangkong Mungdang Tir-isa adenshia aliba yimsüsürtem ajungmesoa jembi.

Tanü iba sentong Tsüngremer lenisüba jazüka Yimyu Baptist Arogo Pastor Rev. Puryapang ajanga sarsademer tenzüka den Ao Senden Tatong Tir Wb. Aowati Ozükum ketdangsüba nung sentong agia telok külemi sarasadema sentong tembanga liasü.

Koridang Assembly Constituency nung ya Polling Station ajak agi 30 lir aser Voters ajak agi 22340 lir.

## NSCN/GPRN 46 buba Naga Republic Day mungogo

**Sashimeren Jamir Suruhoto Designated Camp, March 21, 2026 :** Government of the People's Republic of Nagaland pur 46 buba "Naga Republic Day" sentong 21st March, 2026 nü parnok indang G.H.Q People's Army of Nagaland Suruhoto Designated Camp nung meraketa agiogo.

Tanü iba sentong nung tongti tesemdang NSCN/GPRN tir, Gen. Niki Sumi (Retd.)-i jembidang, iba anogo tajung nung Naga kin-i asen linük kümzükka ayutsü asoshi bendanga agüja taküm bendanga agütsüba aser linük saburtem

nem akümtsübu tulu agütsü. Ano India aser Myanmar nung aliba yimtitem aser jilattem nung nisung aika reshikangshi ajanga Naga nunger ka ama asoba yong karbo tepsettsüsa akümbabo mamatoktsüla, ta pai ashi.

Tang tashi nungbo Naga nunger ajaki asen yimden aser putiotsü temeten junga meteta lir anungji, otsü jembiba kisüngji masü saka tang tensa tia nung temulung agüja asenoki yimdenren nükla tsütsü tejakleni aotsü asoshi külemi lungjemer apusotsü mapang tongogo, ta pai metetdaksü.

Asen tsürabur mezüngpuri

tasü itta telungjem nung Naga linük asoshi tamendakdak nükmen takang yangera yutsü aser joko tang asen tendak asenok lungjemer Khrista asoshi yimden nüchiso ka aginüa aliba tongtetsü asoshi inyaktsüla, ta pai tayongzükba ka agütsü.

Asen tsüraburtemi iba mapang alima yimdenren tatalokba (geopolitical) meteta liasü aser asen senmang yanglutsü asoshi tasü itta aser telemtetba agia apuso, anungji, asenokbo shisatsü ulushir asen linük asoshi külemi shilem agitsü mapangji tongogo, ta paisa ayongzük.

Asen tetsü-tebou zü asen dak tang tashi yimdar; anungji, tarutsü putu asoshi yimden tamendakdak yangertsüsa tsüraburtem ama asenok telung nung tashi angutsü nüngdaker. Asenok meimchir dang süaka asenoki toktsüba senmang jagi mapang tetendanga anema noktaksü ta bilemettang. Anungji, "Naga nunger ajak lungjemer asen Naga kin nem tajungtiba agüjang ta ni kanga mepishir; oda otsü aser tarutsü putu agi asenok mezüngmeshi o mebandangtsü asoshi mepishir", ta paisa ayongzük. "NSCN/GPRN-i teti bendanga agüja

arudar aser maneni asen Naga linük Khrista asoshi noktaksü", ta paisa shisem.

1975 nung India sarkar o telungpur meyonger na tsüngta tenangzüktep agiba ka koba dang "Shillong Accord" ta ajar, iba nungji Naga nunger temeten yokatokba onük kar aliba ajanga iba mapa anema NSCN telok tentet aser GPRN govt. tenzüka Naga nunger temeten wazüka ayutsü aser asen temeten tanaben shilua bener arutsü asoshi Naga Republic Day ya mungyonga arur, ta pai jangjatsü.

(Maneni tapak 8 nung...)

## NPF Mokokchung Division-i orientation ka ayongzüka agi



**Dimapur, Metsüremi/March 21 (TYO):** Naga People's Front, Mokokchung Division-i, Media Awareness & Strategic Communication dak sendakba nung March 21 nü Orientation sentong ka ayongzüka agiogo.

Iba sentong ya NPF Mokokchung Division Office nung kanga takok ngua agiogo.

Iba Orientation sentong nung shisalen sayurji Assistant Professor, Department of Sociology, Fazl Ali College,

Mokokchung Dr. Limasenla Jamir liasü, shibai media awareness, responsible communication aser nüburtem tangatetba yanglushitsü atema digital amshiba shilem indang tangazükba agütsü.

Tanü ama media luyim kanga kara meleshia aoba mapang ka nung khuret angateta tongtepratepba aser digital dak sendakba nung tangzükba akatsüji kanga tongtibang lir.

Iba sentong ya züingsetem

nem shisatsü tali tajungba agütsütsü, tongtepratep tajungba süteptsü aser party tangatetba aser tamendakdak maneni tejakdangi bener aotsü asoshi tangazükba agütsütsü nükjidong nung agiogo.

Sentong nung district kübok assembly constituency balala nungi party kübok telen balala nung inyakertemi shilem agia liasü, ta NPF Mokokchung Division Media Cell sangdong ka ajanga metetdaksü.

## Transport Dept-i number plate nungi temaitsütem agintsü tuyu

**Dimapur, Metsüremi/March 21 (TYO):** Ministry of Road Transport and Highways-i Central Motor Vehicles Rules, 1989 kübok Rule 50 aser Rule 51ajang ajanga benoktsü atema tetuyuba agütsüba dak ajemdaker, Transport

Department-i March 18 nü sangdong ka ajanga sorkar aser nija gari kibur ajak dang registration plate nung temelaba magütsü aliba wako, emblem, tenüing, temaitsü, stiker, seal, logo ajak osang agütsüba sülen ghonda 45

tsüingda agintsü tetuyuba agütsüogo.

Iba tetuyuba sülen manidakertem anema temzüing ozüing dak ajemdaker jenjang tesashi agitsü, ta kasa sangdong ajangasa metetdaksüogo.

## NMMSS dak sendakba nung sensaksem sentong agi

**Dimapur, Metsüremi/March 21 (TYO):** National Means-cum-Merit Scholarship Scheme (NMMSS) dak sendakba nung Nagaland aser kidanger state tem nungi State Nodal Officers & District Nodal Officers tem den anogo ka atema sensaksem Workshop ka March 20 nü Hotel Vivor, Kohima nung agiogo. Iba sentong ya Ministry of Education, Department of School Education and Literacy-i ayongzüka liasü.

Setong nung o jembiba mapang Commissioner & Secretary of School Education Kevileno Angami-i, NMMSS ya North East state tem longjemer inyakba aser shisatsü lemsatepba ajanga shisaluyim dak sendakba nung tetsüdaktsü alibatem bentettsü nükjidong nung amenokba lir ta ashi. Laisa, Right to Education, National Education Policy, Samagra Shiksha, aser Sarva Shiksha Abhiyan indang lemsatep, koba ajanga arishi küm 14 tashi angati aser compulsory education agütsür, aser iba den tangazükdak nükmek akangshidaksür aser tesem aika nung school züingtur anenertem tajemba kümdaksür, ta ashi.

Ajisüaka lai ashiba agi, state kar nungbo rongsenketzüing nung tetsükdaksü adokba, facility maliba aser tanga kuli balala ajanga school züingtur anenertem maneni aika lir. Lai, NMMSS amala scholarship tem agi iba tebilemsü ya bentettsü,

ta ashi.

Lai ketdangsurtem dang kaketshirtem dang len sayutsü aser parnok nongitsü, scheme indang metetdaksütsü, apply asütsü asoshi yaritsü aser tatidang agütsütsü atema renemtsütsü ajungshi, ajita asünungdang temsüa aliba tanurtemi iba tajangzük agitetsü, ta ashi. Laisa, ketdangsurtem dang iba workshop ya kati ka nungi angazükteptsü atema maongka ka ama agitsü ajungshia liasü.

Sentong nungsa Director, SCERT, Kevirale-u Kerhuo-i, NMMSS atema shimshiraba inyakyim indang metetdaksü aser ashiba agi, Nagaland nem scholarship quota 180 agüja lir, koba district 17 kasasa lemdanga lir, aser tatidang agütsüba centre tem ya district headquarter tem nung amenoka lir.

Lai, application indang osang ya local osang kaket, All India Radio, aser official SCERT website ajanga lemsateper, ta ashi. Tatidang ya shilem ana kuma lemsar lir; ka Mental Ability Test (MAT) aser ka Scholastic Aptitude Test (SAT). Qualify asütsü atema kaketshir kati marks 40% bosa angutsüla aser SC/ST candidate atemabo marks 32% tashi atsüzüktsüogo, ta lai metetdaksü.

Kasa mapang nung Director, School Education, Raszouseyie Veyie-i, State nung benoka inyaka aliba scholarship scheme tem indang jembiba mapang

scholarship scheme tongtibang pongu aser centre-i sponsore asüba scheme asem indang jembiba, koba tang Directorate of School Education-i benoka inyakdar, ta ashi.

Sentong nung lokti pela agizükba o jembiba mapang Economic Advisor, DoSE&L, Ministry of Education A. Srija-i, National Education Policy aser Merit Scholarship Scheme indang sensaksemtem atema iba workshop ya ayongzük ta ashi. Laisa, scholarship ya Right to Education kübok 2008 küm tenzük, koba talisa senotsü nung tetsükdaksü adokba ajanga class 8 nung school toktsürtem nem teyari agütsütsü atema benokba lir ta ashi.

Srija-isa, Nagaland nung scholarship menden 180 liaka kaketshirtem ishika dang National Scholarship Portal nung züingoksema lir, ta ashi. Lai ketdangsurtem dang sensaker tanurtem Merit Scholarship atema apply asütsü asoshi teyari agüja parnok education system-i tanaben anioktsü mepeshia metetdaksü.

Workshop lapokba sentong agiba sülen NMMSS Presentation aser NSP Portal ajanga benokba, NMMSS dak sendakba nung Q & A Session aser NIC-NSP, NMMSS dak sendakba nung video tem sayuba, NPCI-i power point presentation agütsüba aser DEOs/DNOs tem den sensaksem sentong agiba amala sentong balala agia liasü.

## CEO-i EVMS aser VVPATS Randomization indang metetdaksü

**Dimapur, Metsüremi/March 21 (TYO):** 28 Koridang Assembly Constituency Bye Election dak sendakba nung Chief Electoral Officer, Nagaland-i March 20 nü EVMS aser VVPATs tem Assembly Constituency/Segment nem agütsütsü atema FLC passed EVMS aser VVPATs Randomization mezüingbuba agiba metetdaksüogo.

EVMS aser VVPATs mezüingbuba Randomization dak sendakba nung tetuyuba tejanga ya Electronic Voting Machine Manual nung shisema lir, koba ECI website: <https://www.eci.gov.in/evm-vvpat> nung angutsü.

Osang ajangsa, Mokokchung district kübok 28-Koridang Assembly Constituency Bye-election nung amshitsü atema mezüingbuba EVMS aser VVPATs Randomization ya March 19 nü agia liasü, ta metetdaksü.

Mezüingbuba EVMS aser VVPATs Randomization ya District Election Officer-i National aser State Political Party tem matsüingdang EVM Management System (EMS) ajanga agia liasü.

Mezüingbuba Randomization sülen Constituency tem nem agütsüba EVMS aser VVPATs list ya National aser State nung agizükba aliba Political Party tem den district headquarters nung lemsateptsü.

Iba sülen EVMS aser NIVPATs ya election nung amshitsü atema Returning Officers Assistant Returning Officers nem agütsütsü. EVMS aser VVPATs tem ya pei pei Assembly Strong Room nung National aser State Political Party tem matsüingdang rezünga ayutsü.

Candidate tem list jangjaba sülen EVMS aser VVPATs tem ya election nung tokteptsü aliba candidate tem den lemsateptsü.

## Assam Rifles-i aluyimertem nem teyari agütsü



**Dimapur, Metsüremi/March 21 (TYO):** March 21 nü Peren District kübok Jalukie Krishi Vigyan Kendra (KVK) nung Scientist aser aluyimertem senden amenba mapang Assam Rifles-i aluyimertem nem teyari agütsüba den parnok ajungmesoa liasü.

Aluyimba nung bushisüingdang aser tekübokba jenjang nung aluyimba tsüingda tawa aliba süngdaksütsü nükjidong nung iba sentong ayongzük agiogo. Sentong nung sepaitemi, tsünüsenpongtsü tali adokdaksütsü aser aluyimba maneni renloka yoktsü atema local aluyimertem dang tawa tanü beshiba aluyimba technology aser bushisüingdang dak amendaker aliba inyakyimtem beshitsü ajungshia liasü.

Iba sentong ya Krishi Vigyan Kendra Jalukie-i ayongzük agi, kong temeket yimsüing nungi aluyimer 80 dak tema, agricultural scientist tem aser ketdangsurtemi shilem agia liasü.

Sensaksem sentong nung metsüjangnatsü tapu balala, organic farming tasatem, integrated pest management, ali health management, tzü wazük ayutsü aser tsüingsang mongpung dak apet aluyimba amala onük balala benoka sensaksema liasü.

Scientist temi precision farming, bio-fertilizer amshiyim aser tsünüsenpongtsü tali

adokdaksütsü aser rongsen timba aazüktsü asoshi crop diversification dak sendakba nung tawa tanü purapitetba tem indang lemsatep.

Sentong nung aluyimertem mongintem den sensaksema parnok tetsükdaksü ajangshibatem koda bentettsü iba indang asüingdangya liasü, kong anentsü aluba, ozü sangnu agi minprongba aser mongpu balala nung tsünüba tsünüsenpongtsütem junga maruba densema liasü.

Sentong nungsa scientific composting methods, irrigation systems tedangshi aser tawa tanü aluyimertem amshiba hadirtem amshiyim sayua liasü. Maneni sentong nung aluyimertem lokti tentet tenzüktsü nüngdakba aser shishilembadak balala den sendakteptsü koda tongtibang iba indang sensaksemogo.

Assam Rifles personnel temi aluyimertem nem logistic teyari agütsü aser libaliro jenjang ajungkettsü atema scientific aluyimba inyakyimtem agizüktsü ajungshia liasü. Sensaksem ajanga aluyimertem aser aluyimba rijutem tsüingda telongjem adokdaksüogo aser iba ajanga shisatsü lemsateptsü asoshi sabang ka lapoktsüogo.

Iba inyakyim ajanga northeast nung lokti ajangzükdaksütsü aser yimdak yimsüingtem terenlok asoshi Assam Rifles' bendanga agütsür aliba sayur.



March 21, 2026 nü Surat nung ayongzükba 'Blood Donation Camp' ka nung temelungertemi azü tenladang tangokba noksa nung angur.

### Shingaia tesempa o mejembitsüla: SC

**New Delhi, March 21 (Agencies):** Supreme Court-i Brahmin nungertem anema tesempa o jembiba ken o ka angadangsü memelung.

Justices- B V Nagarathna aser Ujjal Bhuyan nati akümba bench-i, kin kar anema shingaia tesempa o mejembitsüla ta ashi, ajisüaka temepishiba ken oji angadangsü memelung.

"Kin kar anema tesempa o jembibaji onoki maginer. Ibaji shisaliok, tangatetba, taremzüktep aser aremzükba dak keta lir," ta bench-i ashi.

Bench-i iba ken oji magizük, anungji ken o benoksang, Mahalingam Balaji-i ken oji agien.

Ken o angadanga mapang nung Justice Nagarathna-i, kechiba kin ka anema tesempa o jembiba anema dang inyaksü? kechiba tangartem atemabo mejembitsür, ta asüngdanga liasü.

"Shingaia tangar anema tesempa o mejembitsüla. Ken o benokeri court nung masü saka tanga sabang nung ang ibaji benoktsü akok," ta bench-i ashi.

Balaji-i, social media nung

judiciary anema-a jembir ta ashi, ajisüaka bench-i, tiyazü nung judiciary anema jembiba atema court-i tebilemtsü makar, ta ashi.

Balaji-i, Brahmin nung anema tesempa o jembiba atema temerenshi agütsütsü asoshi Centre aser state sorkartem nem tetuyuba agütsütsüla, ta court dang mepishia liasü.

Paisa Brahmin nung anema tesempa o jembiba sorkar mapa inyaktertem aser ketdangsertem nem temerenshi agütsütsüla, ta mepishia liasü.

### PM Modi-i Iran Tir Masoud den West Asia tensa atema jembiba

**New Delhi, Metsüremi/ March 21 (Agencies):** Honibarnü Ato kilonser Narendra Modi-i Iran Tir, Masoud Pezeshkian den West Asia tensa atema jembiba den külemi Iran yimtibam, Tehran nung tongtibang kiojen aika amakba aitsü.

Tesülen Modi-i X ajanga, "Region nung aliba tongtibang kiojen aika amakba aitsüogo. Iba ya ajanga region amokmerener aser alima nung supply chain raksatsür," ta metetdaksü.

Paisa, "Tzüyim nung sademsadema senzüba wazüka ayutsüla, koba ajanga rong sademsadema senzütettsü," ta metetdaksü.

Ato kilonserisa Eid al-Fitr aser Nowruz salem lemsatapa, "Iba benjung mongpu ajanga West Asia nung yimjung aser azükaru bener arutsütsü onoki imlar," ta metetdaksü.

Iran yimtiba, Tehran nung India nungertem yariba atema tepela lemsatapa Modi-i, "Iran

nung India nung kümzüka alitsü atema maneni inyakba atema Iran dang pelar," ta metetdaksü.

Honibarnep-a United States aser Israel nati senteper Iran nung aliba Natanz uranium-enrichment facility amak.

Taküm February 28 nü rara tenzükba sülen tang agi tanabenbuba Modi-i Iran Tir den jembigo. March 12 nüa Ato kilonser Modi-i Iran Tir Pezeshkian den jembia liasü.

Iba mapang nungji Modi-i X ajanga, "Iran Tir Masoud Pezeshkian den region nung tensa tamajungba akümba atema o lemtepogo. Tensa tamajungba akümba aser nisung aika asüba den kiojen aika raksaba atema tebilemtsü akaba lemsatepogo," ta metetdakja liasü.

Iran-i rong senzüba tongti lenmang 'Strait of Hormuz' nokdanga ajanga India nung LPG agi anüngtsü arendaka India-i mapang shia Iran den jembir.

### Bengal nung ISF-i menden 33 nung tokteptsü

**Kolkata, March 21 (Agencies):** West Bengal assembly election nung Indian Secular Front (ISF)-i menden 33 nung tokteptsü ta parnoki metetdaksü.

ISF MLA, Nawsad Siddiqui-i, CPI(M)-i aniba Left Front kübok ozü party-i menden 29 nung tokteptsü, ajisüaka onoki Nandigram, Panskura Paschim, Bhagabangola aser Murarai nunga tokteptsü, ta metetdaksü.

Telok ana tsüngda tezüngzüktepbo magi ajisüaka

party-i item menden pezü nungjagia tokteptsü telemteba agiogo aser Left Front nem-a iba osangji metetdaksüogo.

Osangbenertem den jembidang Siddique-i, "Item menden pezü nungji Left Front-i candidates meshimtsü ta onoki imlar," ta metetdaksü.

Tilateri mangatetep karbo lir, ajisüaka nominations metenzükdang item ajakji bentettsü imlar, ta paisa metetdaksü. ISF-i tokteptsü aliba menden 33 nungjagi menden 8 South 24 Parganas

nung lir aser menden 8 North 24 Parganas district nung lir.

Siddiqui ya Muhammad Abu Bakr Siddique nungi jakzükba lir aser tang assembly nung ISF nungi MLA ji pa kija lir. Pai taoba election nung South 24 Parganas district nungi toktepa liasü aser taruba election nunga kasa menden nungisa tokteptsü.

West Bengal nung assembly menden 294 atema election shilem ana lemsar April 23 aser April 29 anogotem nung election agitsü aser May 4 nü votes azüngtsü.



March 21, 2026 nü Bengaluru nung "Artificial Intelligence (AI): Dispute Prevention and Resolution" sentong nung adenba sülen Chief Justice of India, Surya Kant-i Karnataka Judicial Academy semdangba mapang tangokba noksa nung angur.

### Diabetes atema research agitsüla: Union Minister Dr Jitendra Singh

**New Delhi, March 21 (Agencies):** Medical tsütsü mongin lanurtemi diabetes research nung shilem agitsüla, ta Honibarnü Union Minister Dr. Jitendra Singh-i metetdaksü.

Diabetes research agiba nung shilem tajung agiba atema MV Hospital-i Union Minister of State (independent charge) for Science & Technology and Earth Sciences, Jitendra Singh nem MV Lifetime Achievement award agitsü.

Anogo asemnü 'MVCON

2026' National Conference ya MV Hospital-i ayongzükba liasü.

Union Minister-i, "Tamil Nadu dang ni sentsüh tulu lir aser kü nem MV Lifetime Achievement Award 2026 agütsüba atema pelar," ta metetdaksü.

Iba sentong nung jembidang pai medical tsütsü lanur mongintem dang diabetes research aser diabetes agi shirangertem yariba tsütsü research agitsü ayongzük.

Iba conference nung doctor tem, healthcare tsütsü

mongintem, diabetes care atema research agirtem aser diabetic foot specialist 1,000 shi aden.

MV Hospital for Diabetes Chief Executive Officer, Dr Viswanathan Vishnu Vijay-i, "MVCON 2026 ya tang mezüng MV annual scientific update asüba küm lir. Specialities balala longjemdaksüba ajanga diabetic foot nokdangsü atema inyaksü. Iba atemaji amalitepa inyaksü aser mapang shidak nung inyaksü nüngdak," ta metetdaksü.

### Maharashtra nung Maoists 11-i surrender asü

**New Delhi, March 21 (Agencies):** Maharashtra state kübok Gadchiroli district nung Divisional committee züngsem ka densema Maoists telungpur 11-i surrender süogo.

Gadchiroli district kübok subdivision 10 nung Maoists telungpurtem kanga yakyaka liasü, ajisüaka tangbo state arrtsülen aliba Bhamragad subdivision nung ang telungpurtem yakyaka lir, ta police-i metetdaksü.

Temai adoker Maoists telungpurtem rongnung divisional committee member (DVCM) ka, area committee secretary ka aser Perimili popular committee member (PPCM) ka densema liasü.

Parnok rongnung tongtiji Yamunakka (Rukhmakka Potti Pendam) lir. 1982 küm pai Maoists telok nung aden aser Gadchiroli nung pa anema ken

o 27 benoka lir, aser item ken o rongnung 16 bo raraba den sendaktepa lir, ta police-i metetdaksü.

Taküm January ita nungi tang tashi nung Gadchiroli nung Maoists 123-i surrender süogo aser parnok rongnung central committee member Mallujola Venugopal densema lir.

Venugopal-i surrender asüba sülen linük tesem balala nung Maoists 897-i surrender süogo aser prangpong 545 bendanga agütsüogo, ta police-i metetdaksü.

Centre sorkari March 31, 2026 anogo tashi nungbo Maoists meshimeshia samatsütsü nükjidong ataloktsü joko anogo ishika dang lia Maharashtra, Chhattisgarh, Telangana, Madhya Pradesh aser Andhra Pradesh state tem nung Maoists aikati surrender süogo.



March 21, 2026 nü New Delhi nung aliba Jama Masjid nung Muslim nungertemi 'Eid Al-Fitr' benjungmong anogo nung sarasademba noksa nung angur.



# TIR YIMYIM

## YIMOBILEM (EDITORIAL)

DIMAPUR

AMUNGNÜ

METSÜREMI 22, 2026

### Temulungjang temerük

**A**senok jembishinü aser inyaksangshiba yimyayimpong agi asenok mulungjang sayur. Tetezü, asen mulungjang mesüra mulungsentsü memerüki tamajung dang bilema lira, asenoki tangar daka tamajung dang reperangtetsü. Ibayongji, Yisui asenok dang Luke 6:42 nung asenok tenük nung aliba anak tama endoker külenang tangar tenük nung aliba anak repringtsü ajungshia lir. Atangji asenoki tenük agi angur saka asen mulungjang nung kechi bilemer iba amaji dang asenoki repringtetsü. Aji oda, asenok mulungjang memerüki lira, asenok tenük agi tangar dak tajung aliba merepringtetsü. Ajisüaka, kodang asen mulungjang merüka lidir asenoki tangar dak tajung aliba repringtetsü aser tangar indang tamajung mebilemtsü. Tenyar Paul-i pa den külemi Tsüngremer wadang nung temulung ka ser inyaksang Tita dangi züluba shiti nung, "Temulungsentsü merüka alirtem atema ajak temerük asütsü saka temulungsentsü memerüker aser mamangba purtem tsüngdang ajak memerük asütsü, kechiyong parnok shisatsü aser temulungjang memerük lir," ta Tita 1:15 nung shia angutsü. Kodang, asenok mulungjang nung tajung bilemer asenoki tangar anema mebilemer aser tangari tamajung bilemyonga asenoki item tamajung melena tajung agütsütetter. Tangar majung masukba aser tangar nüngsen mejembiba tebang temeliji shisatsü temerük adenba purtem dak keta lir. Item jagi tangar tai mapur saka kech tajung aji repringa tenüngsang agütsür. Iba jagi adianu aser medemertem rongnung teputep adoker. Shisa tajung aser temulung temerük nungi temeim adoker aser tangar asoshi tayari aser temoatsü angudak taküm ka akümer. Aji oda, Mathi tapu 6:22 nung Yisui asenok dang angatetdaksünüba o tongtibang kaji ,asenoki tangar dak tamajung ajitetra asenok pelaa malitsü aser iba mepelabaji tulu asütsü saka asenoki tangar dak tajung ajitetra asenok kanga pelaa alitsü ta shia lir. Aji oda, asenok libaliro nung asenok tamangertem asoshi tongtibang kaji, asenok temulungjang aser shisatsü merükmerüka alitsüba ya lir. Asenok shisatsü memerüki lira asenoki angashiba kecha nunga tajung mangatetsü aser shinga daka temulung malemtsü. Tanübo asenoki asenoksasa asenok mulungjang ken meyipa repringdangdi. Asenoki tangar indang tamajung bilemer asü ? Tangar dakbo tamajung-tamajung dang repringtetter asü ? Nai tangari inyakba mapa ajak nung aija anidaker asü ? Iba ama shisatsü agi na mepelateti lira, tang nai Tsüngrem dang nü mulungjang, nü mulungsentsü aser nü shisatsü ajak merüktetjang ta shiang. Nai Tsüngrem nem nü mulungjang tejenbaji agüjang aser aji tasen temerük ka agi melenjang ta shiang. Nai ochi mulung agi, tang Tsüngrem dang shisatsü tajung adenba temulungjang temerük ka aginer ta shira, Pain ü nem iba temulugjang temerükji agütsütsü aser tanü nungi na pelaa alitsü. Ibai na asoshi shi atema mozü tajungtiba aser tanüla asoshi

## OLEMSABANG

### Naga lima unemployment tebilemtsü

Imsumongba CTC

Meimchir ajaki tanur asü dang nungi taküm nung nükjidong aser tejangraba balala ayur. Ni züngtemer kenübo iba mapa nung tenzüktsü, ni ibaji asütsü/akümtsü mesüra yamala mesükba nükjidongtem balala ayur saka aikati item nükjidongtem metongteti pungmang ka ama dang küma odaktsüba aika lir.

#### Süra ya kechi tai ?

Küm shia, Nagaland nung meyirijang trok tema lanur tazünger graduate asür ta ashir, saka govt. job maongka meyirijang ka shi-a majung nguteter, süra tanüngba meyirijang paikaji kongi aotsü? Asen lima nunga tangar menepa degree balala nguteter aika lir saka kar dak alaka ajakibo nükjidongtem aser tebilembatem kechiba majangzükteter? Ya teshisadangtsü tuluka lir.

Asen Naga lima nung clean election takok bener arutsü asenoki jembir aser nükla balala ayur saka nübur mulungjang nung kodang iba unemployment tebilemtsü ya lidir asen Naga lima nung ochimashiba anentsü tamakoktsü aser clean election nükla ka dang akümtsü.

Asen Naga lima tensa ya repringdangra kaket shisa luyimer jenti adokba linük ka lir. Tazünger jenti lir saka züngzüker mapa maka pei kidang senti mapang tajung ajak intokba lanur aika lir. Ya asen lenirtem, aser ajak asoshi tebilemtsüka masü na? Küm shia nübur züiner saka maongka maliba küma aor. "Tesem ka nung Tesayur kaji tangazüker melira menügdaker masü no?" Shisatsü aser sempet jenti bena liaka teinyaktsü kimong melira kechi tenügdaktsü? Naga nungertem asoshi ya tebilemtsü masü na? Shirang tulu agi tonger yipten nung lungdaka kazür mesüka Naga nunger lanur tazünger nübu tajung aika pei yipten nung mapa kecha makai shiranga lir. Süra iba shirang ya koma anepbalutsü mesüra mozüji kechi asütsü? Tebilemdangtsü, temelenshitsü takoktsü karbo lir mali?

Mapang balala nung asen lanur tajung ana ajurua sensak asem dang mezüngbuba lanuri yamai ashi, "ayah odi! Ni tsüraburi züngdaksünüba ama tashi anga-a India lima college tajungtiba nung kütazünga temogo, saka kü tejangraba ajak agi shishilembaba mapa ya dang inyaknür, anungji kütsü aser kübu tena dang lemsateptsü meranger saka joko iba indang anasai arua jembitsüa memelar, sokar mapaji kechi südir süaka angutsüla ta asürji kidang taktang nung tezü tanga moka kazüra,". Tanabuba lanuri ashi, "civil engineering tembangogo saka kü tejangraba ajak agi ni kü sasa mapa kar tenzüka oa taküm ya jangratema linür saka obalai ni temenen tanelai pur parnoki ashi mangar amai bilemerji oda tatidang balalaji agütsüdang saka takok mangurji yamai tamagitsü nisung amai kazür." Ano maneni kenü Dimapur lenten lima tangar nisung chana motor ayoker ka ajurua sensak asem dang yamai ashi, "kütsü tasolai ni asodang nungi yamai tangar memeneptsüsa asoji ni yangi kopika noktadir nisung katibosa ni nüka noktaker saka kü sasa tepok mesüa alir. Ni tekatibo ajak inyakteter, oda tetsüng agi mejajateterdangji iba talongtsü ya bener anogo ka nung sen 1000-3000/- tashia ar, oda 1000/- jibosa arura ta ashi."

Idangji, kü mulungjangi tanü asen tensa lanurtem zünger mapa manguba tebilemtsü indang kangasa aroka shisadangtsü tenzük.

Tsürabur akhi mapangbo pei tazüngba yari mapai dang nisung bushia aruba putu liasü saka tanü tensabo postgraduate aser doctorate tashi zünger mapa mangur, anungji tsüraburi akhi mapang den metemdanga pei chirjia kasa sorkar mapaji angu nung dang mapa amai bilema pei chirnur tejangrabatem soita yur sorkar mapa nungji dang inyaktsü majungshitsüla, meteta aser memeteti kidang kibong taktang nung ak ama nisung metsürtem aika lir.

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Chhattisgarh nung Khristan ka nem kangshia 'Jai Shri Ram' ta shidaktsü



Chhattisgarh state nung Hindu nunger telok kati azükba tainlonglong Khristan (ajichilen) noksa nung angur.

**March 21, 2026:** Chhattisgarh state nung Hindu nunger telok kati tainlonglong Khristan ka dak azükba den külemi kangshia 'Jai Shri Ram' ta shidaktsüba anema Khristan lenirtem aikati ola adoka aitsüogo, ta osang ka ajanga metetdaksü.

Chhattisgarh state kübok Champa district nung atalokbaji video nung tangokba sülen March 18 nü social media nung lemsatop.

Video nungji Hindu nungertemi tainlonglong Khristan ka dak tola nung amer aiben maakoktsür aser kangshia 'Jai Shri Ram' ta shidaktsür.

Tanur asünung tetsübu nung pai Jai Shri Ram ta ashi, ajisüaka parnok maneni pa dak azük.

Iba video ji social media nung prokshiba sülen Khristantemi dang masü saka tanga yimsü amangertemia iba tatalokba sashia aitsüogo.

Champa district nung police-ibo parnok ibi tatalokbaji memetet aser iba tatalokba anema ken o benoka mali, ta metetdaksüogo.

Rashtriya Christian Morcha Tir, Kamal Kujur-i, "Iba ya tebilemsü onük tuluka lir. Tanü-asüngbo anogo shia amai Khristantem amakba osang

onoki angashir," ta ashi.

March 19 nü osangbener den jembidang Kujur-i, item ama tatalokba ajanga Chhattisgarh nung Khristantem aser Khristan rejutem atema asentenshir tebilemsü akar, ta ashi.

Paisa, "Sorkar ketdangsertemi tekeraba nung mera agia inyaksü aser tesünep atema inyaksü asoshi onoki sarasademer," ta ashi.

March 11 nü Chhattisgarh State Cabinet-i Freedom of Religion Bill agizükba ajanga state nung Khristantem kanga shisabuluteper, ta pai ashi.

Iba Bill tasenba ya agizükra iba ya ajanga Chhattisgarh Freedom of Religion Act 2003 ozüng melentsü aser ozüng tesashiba akümtsü.

Kujur-i, "State legislative assembly nung iba bill agizüka ozüng kümra ibaji ajanga tebilemba tamajung alirtem ajungmesotsü, aser tang atalokba ama tatalokba aika alitsü ta state nung Khristantemi shisabulua bilemer," ta ashi.

Chhattisgarh state yimtiba, Raipur nung Khristan temeden atema inyaker Binay Lakra-i, state nung Khristantem anema inyakba aser amokmerenba

ajanga tamangertem kanga tsübur, ta metetdaksü.

Taküm January ita nunga Narayanpur district nung Khristan kibong anati tangartem Khristan yimsü dangi meyipdaksür ta tai tonglokja lokti kati azük aser kidang nungi meindokogo.

Yaküm May ita nung Kabirdham district kübok Kawardha nung Khristan school lapoka alir kibong ka maaka liasü.

Dantewada district nunga Khristan 14-i Khristan yimsü toktsütsü memelungba agi lokti kati parnok dak azük.

2024 küm Chhattisgarh nung Khristantem anema inyakba tatalokba 165 liasü. India nung Khristantem anema inyakba tatalokba teimba aliba state tem rongnung Chhattisgarh ya jenjang tanabuba nung lir, ta United Christian Forum-i metetdaksü.

Evangelical Fellowship of India Religious Liberty Commission-i ashiba agi, yaküm January nungi July ita tashi nung Chhattisgarh nung Khristantem anema inyakba tatalokba 86 liasü.

Nütsüng million 30 aliba Chhattisgarh state nung nütsüng shilem 2 dang Khristantem lir.

## Khristantemi Iran nung tepuokdak alirtem chioktsü ayongzüker

**March 21, 2026:** Khristan temeden atema inyaker telok kati Iran nung yimsü mesüra yimtenren dak sendakba nung tepuokdak yua alirtem kümzüksü aser chioktsü atema alima linüktem dang inyaksü ayongzüker.

Christian Activists for a Free Iran (CAFI) telok nung ya meimchir temeden atema inyakerterem, lawyer tem aser pastor tem aika lir.

CAFI-i, Iran nung aliba tepuokdak balala nung alirtem dak tim mesüi benshir, reshikangshir, tashiyim amshia raksatsür, tetsürtem dak nungi no-menden indoktsür, kangshia temesepba mozü chidaktsür aser medical teyari junga magütsür, ta metetdaksü.

CAFI-isa, taküm küm

tetenzüklen Iran nung yimsüsürtem anema longkak aiterem-a aika tepuodak puoka lir, aser karbo arrshi küm 15 tanurtema densema lir, ta metetdaksü.

Tang alima nung Khristantem reshikangshiba linük tamajungtiba 50 rongnung Iran ya jenjang 10buba nung lir (Open Doors).

Iran nungbo Islam yimsü toktsür Khristan yimsü agizükba ya ozüng alema inyakba aibelen ka lir, aser tasüba temerenshia agütsütsü akok.

CAFI-i alima linüktem dang Iran nung yimsü mesüara yimtenren dak sendakba nung puoka alirtem mita repringtsü aser tekeraba nung parnok chioktsü atema inyakdaksüner, ta ayongzükerogo.

CAFI Director, Attieh Fardi, "Alima linüktemi ola madoki dang toktsüba ajanga Iran nung maneni meimchir temeden balala anema ano tamajungba dang inyaksü. Ajisüaka mapang shidak nung tiyongtsü ia inyakra taküm aika kümzüksü," ta metetdaksü.

Bendanglen aliba Iran nung Khristantemi par linük nung Khristantem anema inyakba anema longjemer ola adoka arur, ajisüaka tang US/Israel aser Iran tsüngda rara tenzüka sülenbo parnok tangatetba tsütsü telemsa adokogo.

Bendanglen alir Iran nung Khristan karibo Iran amakba ya aitsür, ajisüaka karibo Israel aser US nati Iran amakba ya pusemer.

## ANOGO ABEN TSÜNGREM DEN

## Mejangba Tanela

- T.Ken 119:145-152

Nai mejanga alidang nungibo Tsüngrem O ji ang aginer asü? Ya aibelena tangatet. Mejangtsübaji asenok atema nungdaker. Tsüngremi asenok sasa asen temangji anebaludaktsüner aser anebaluba nung mejangbaji shilem ka lir. Laishibai asensasa asen temang anebalutsü shia lir. Saka ken züluri mejangba dang nungi Tsüngrem O jiang agitsü ta ashi. "Ni mesangwa dang shishir, aser teyari asoshi ayimtener; ni ne O nung yimlar. Ne O nung ni shidangtsü asoshi kü tenük aonung saaka alir" (t.117,118).

Yisua anepdang yakta saker sarasadem aser Tsüngrem O nung shisadang. Aser sentsü melenba Tenem nung Yisu, Mosa aser Elijah Yirusalem nung Yisu asütsü indang jembitepa liasü. Peter, Yakob aser Yohan idakji liasü, saka parnok mejanger liasü (Lk.9:32). Alima nung Laishiba mungdang tulutiba mapang parnok mejanger liasü.

Tanüa karibo kasa mapaji inyaka alitsü akok. Temoatsü ajanga asenok mejanger. Tsüngremi Pa O ajanga asenok moatsütsü asoshi asenoki anogo shia Tsüngrem O agi tenzüksüla. Nai anepongi Tsüngrem O ji azünger asü masü? Atangji yipden nung minute 30 tali agibaji temoatsü asütsü. Saka ken züluri ashiba ama, asenokia shitettsüla, "Ni anepdang arutsü yongyar. Ni Tsüngrem den mapang indokner aser Pa O nung shisadangner."

Tsüngrem O nung shisadangtsü asoshi tenla agütsübaji tesama masü; ibai tanelaren taküm nung terizüngba ka lir. Nai anünga aliba anüngdang amshitsü akokba temoatsü Laishiba nung lir. Ibaji anüngdang lapoktsü aser shibangba sapiji südakjang. Ne anogo Laishiba agi lapokdakjang aser ne aonung Laishiba agi shibangang.

## Los Angeles nung Hope Fest atema tamanger million kati sarasademer

**March 21, 2026:** Los Angeles nung 'Hope Fest' dak taküm kuli lemsateptsü, Tsüngrem O jembitsü aser sendakba nung sarasademtsü, baptitsü.

lumitsü aser nüburttem den Azusa Street Revival Khrista osang lemsateptsü ajanga ajungmesoa 'Hope L.A.' atema nisung million 1 dak ayongzüka agitsü Hope temai anogo 40 nü tashi California Tir, pastor Che Ahn-i apiteta liasü.

March ita nungi tenzüka Hope California tentetsang, April 11 tashi sarasademba Mando Matthews-i, sülen April 11 nü "Tsüngremi Pa tanela tatembangbuba sentongji L.A Memorial Coliseum nung agitsü.

Hope California-i Lou Engel-i, "Onoki California sayutsüngirtem, missionary tem Lou Engel-i, "Onoki California aser volunteers dang Los temesem balala nung tanur-tain Angeles nung nüburttem aika ajak dang iba stadium nung ayimjemtsü atema Arogo nung adenshia Hope L.A nung lenirtem den amalitepa adentsü ayongzüker," ta inyaksü ajungshir. metetdaksü.

April 11 nü tatembangbuba "Hope California" ya April sentong nungji tekülem agitsü, 11 nü Los Angeles nung agitsü.

### AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

#### Walaksang

- (n) au talak (the end part of tall bamboo)
- \* Süngküm rong nung walaksang ali tonga angumzüka alur.

#### Washiwara

- (v) süngrangtsü amshia mapa tilateri inyakba (do minor works with saw)
- \* Süng ki yangludang washiwara mapa kanga adoker.

### OLONG PAITEP # 7451

1			2					3		
4								5		
							6			
						7				8
			9							
								10		
11							12			
13										

#### TIPIEN

- 2. Teka mapa tajung - (8)
- 4. Anakshinüba - (5)
- 5. Süoshi agi tazü - (4)
- 9. Aria bilemtep - (7)
- 11. Ajemalu ozü - (4)
- 12. Tzü an - (5)
- 13. Teben teloktep - (8)

#### LANGTSÜNGLEN

- 1. Anepalua inyak - (7)
- 2. Teptsü - (4)
- 3. Nok agi raratep - (6)
- 6. Kibong aküm - (4)
- 7. Nüji masü - (4)
- 8. Taruba küm - (7)
- 9. Teka shidok - (6)
- 10. Meputep/Mapet - (4)

### OLONG PAITEP # 7450 TELANGZÜBA

#### TIPIEN :

- 1. Tesangra, 5. Mungo, 7. Kisen,
- 8. Salem, 12. Semki, 14. Kilem,
- 15. Kensü, 16. Sangpang.

#### LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

### NAI-A YA METETTER MA



March 20, 2026 nü Pakhala Divas nung Odisha Tourism department-i "Largest Serving of Pakhala" indang Guinness World Record yangluogo.

Odisha Tourism-i vessel ka nung Pakhala seret 1,174 yanglu aser iba ajanga Odisha nung sobaliba nungi kanga sapua achiba Pakhala alima nem tali jangjadaktsüogo.

### Sorkari Presbyterian Church nem Jordan center agütsü



**Aizawl, March 21, 2026**

**(Agencies):** Mizoram nung substance abuse anema inyakba tashi itshitsü atema state sorkari Mizoram Presbyterian Church ket nung Jordan Center agütsüogo.

Mizoram nung rehabilitation facilities tulutiba rongnung Jordan Center ya ka lir.

Iba atema Social Welfare, Women and Child Development (SW&WCD) Minister Lalrinpuii indang office nung Memorandum of Agreement

(MoA) ka nung sign sütepogo.

Iba MoA nung SW&WCD Secretary Lalzarmawii aser Mizoram Synod Moderator Rev. John Raldosanga nati sign asü.

Iba tenangzüktep nung Jordan Center melenshitsü atema 15-year roadmap tongti lir. Iba centre ya Assam arrtsü anasa Kolasib district kübok Sethawn nung lir.

MoA kübok Mizoram Synod-i Jordan Center bendanga ketdang asütsü lateta lir. Iba asoshi state sorkari

kümshia grant-in-aid Rs 50 lakh agütsütsü aser iba ya küm anashia 5% ajungkettsü ta latetogo.

Iba centre ya specialised de-addiction aser aftercare centre ama inyaktsü aser rehabilitation, counselling, o reintegration support agütsütsü.

Iba tesentaktep ajanga loktii shilem agiba aser iba nung Arogoi service delivery nung dang masü saka long-term behavioural aser social outcomes atema tongti shilem agütsü.

### WWF-India-i Assam school 5 nem tetushi agütsür

**Guwahati, March 21, 2026**

**(Agencies):** WWF-India-i 'Mission Prakriti' programme kübok Assam nung school tajungtiba pungu nem tenüngsang agütsüogo.

Iba sentong ya Samagra Shiksha indang State Mission Office nung agi aser education officials o environmental leaders aden.

Assam nung 2025-26 academic year atema sempet agütsüba school temji- Natun Fatasil Town HS, Kamrup (M), Sakai Khangia High School, Jorhat, Bishnu Jyoti MES, Sonitpur, PM Shri Jamira

Higher Secondary School, Hailakandi aser PM Shri Gossaigaon Girls High School, Kokrajhar lir.

Maneni, WWF-India-isa Tinsukia district nem Best District sempet agütsü aser district 10 nungi nodal officers nem tetushi agütsü.

'Mission Prakriti' ya sentong ka dang masü saka movement ka lir. Iba ajanga kaketshirtemi sustainability concepts angazükba dang masü saka school aser lokti nung mapa küma inyaker ta State Director, WWF-India (Assam & Arunachal Pradesh) Archita

Baruah Bhattacharyya-i ashi.

'Mission Prakriti' ya kaketshirtemi anir inyakba mapa ka lir aser iba ajanga biodiversity, water, waste, food, aser energy nung temulung agütsür.

Assam nung iba sentong ya district 35 prong nung 4,723 ICT-enabled schools nung tenzüko.

Linük kübok state 7 nung 'Mission Prakriti' ya government schools 23,000 nung tenzüko aser iba nung tesayur 56,000 aser kaketshir lakh 5.6 lakh temai shilem agir.

### Sanfida Nongrum ya Meghalaya atema chichiba konang

**Shillong, March 21, 2026**

**(Agencies):** "Meghalaya tsür footballer Sanfida Nongrum ya asen state atema chichiba konang" ta Chief Minister Conrad K Sangma-i metetdaktsüogo.

Arishi küm 20 tain Nongrum-i AFC Women's Asian Cup nung otsüsütsü süa asayateta liasü. India tsür kati continental tournament ka nung küm 23 lir külen mezüngbuba goal agütsürji la lir.

Maneni, Meghalaya nungi senior level nung tetsür kati India tenüng nung shilem agibaji Nongrum lir aser iba ajanga Meghalaya nung women's football atema alizüng tongti ka tongtetogo.

"Tanü Sanfida Nongrum den ajurutepba atema kanga pelar, la ya asen state atema chichiba konang lir" ta CM Conrad-i



metetdaktsü.

"Lai national aser international sabang nung maneni shilem tajung agidang ni la yaritsü. Lai maneni takok angutsü moatsür" ta paisa ashi.

Tesüiba nung Chief Minister Conrad-isa Nongrum nem Rs 2 lakh financial grant agütsütsü aser tarutsü nung la yaritsü metetdakja liasü.

# Japan nunger rongtem Strait of Hormuz ajanga yoktsü: Iran

**Tehran, Metsüremi/March 21 (Agencies):** Iran-i, Japan nunger rongtem Strait of Hormuz ajanga yoktsü, ta shiogo aser iba ajanga iba tzu lenmang aden mesenzüdahtsü atema linük kar dang nokdangtsü tenzükba sayur.

"Onoki strait meshibang. Onoki bilemtsübo strait ya lapoka dang lir. Iba lenmang ya onok tsüchirtem aser onok amakba linüktem atema dang shibanga lir. Tanga linüktem indang rongtembo iba lenmang ajanga süitetsü," ta Iran Foreign Minister Abbas Araghchi-i Japan indang Kyodo News dang Hokolbar aonung ashi.

"Iba tesem kecha tetsüdahtsü makai süia aotsü asoshi onok parnok den sensaksemdar. Parnok nem kecha timtem magütsü yoktsü onok renema lir. Iba lenmang ya koda amshitsü iba indang onok den sensak asemtsü dang nungdaker," ta Araghchi-i ashi.

Japan-i totzü shilem 90 dak tema Middle East nungi bener aruru aser parnok iba strait ajanga aruba export tem dak metaloker lir, ajisüaka United States aser Israel nati February 28 nü nungi Iran amak tenzükba sülen iba tzu lenmang ya shibanger lir.

Iran indang Islamic Revolutionary Guard Corps (IRGC)-i rara tenzükba sülen iba tzu lenmang adena aotsü merangba rongtem ajak rongtoktsütsü ta amokmerener liasü, aser iba ajanga rong senzüsenpong nung tetsükidaktüsü adoka liasü..

Ajisüaka hopta ka ana tsüngda Iran-i parnok tamendakdak melechia iba lenmang ya Tehran tsükchirtem atema dang shibanga lir ta shia arudar.

Japan ya yakta iba tesem ajanga süidaktüsü linük ishika den adentsü akok, kong China, India, aser Pakistan densema lir. Item linüktem indang rongtem ya Iran nunger ketdangsurtemi temelaba agütsüba sülen anogo ishika tejakdang nungi senzü tenzükogo.

Shipping aser maritime information service Lloyd's List sangdong ka ajanga ashiba agi, iba strait nung Iran tüküm anasa rong ter süiaogo. Iba lenmang ya rongtem asoshi tetsükidaktüsü majangshiba lenmang ka kumogo.

Tesüsa Greek nunger indang rong ka Hokolbarnü Iran kübok Larak asetkong anasa süiaogo, ta Lloyd-isa metetdaktüsü.

Rongtem ya case-by-case basis nung iba tesem süia odar. Lloyd's List-i ashiba agi, IRGC-i registration inyakyim tasen ka yangludat.

Iran rara tenzükter hopta asemubaba aoba mapang linük ishikati (US den sendaktepa aliba linük densema) Tehran dang strait tanaben lapoktsütsü mesüra rongtem kecha tetsüdahtsü makai süidaktüsü

asoshi mepeshia arudar.

Iba hopta tetenzüklen Japan, France, Germany, Italy, Netherlands, aser United Kingdom nungeri külem sangdong ka ajanga iba strait ajanga rongtem kecha tetsükidaktüsü makai süia aotsü asoshi jenjang tapet agitsü atema teyari agütsütsü renema aliba lemsatepogo.

Iraq, Malaysia, China, India aser Pakistan nungeri iba ken o ya Iran den indang indanga sensaksemogo, ta Lloyd's-isa metetdaktüsü.

Japanese Foreign Minister Toshimitsu Motegi-i Mongolbarnü Japan nunger rongtem aika Gulf nung taolen makai bangdaka aliba indang tebilemtsü aliba indang lemsatepba sülen Araghchi-i iba telangzüba ya agüja liasü.

Kasa mapang nung Iran-i Indian Ocean nungi U.S.-U.K. military base Diego Garcia dak ballistic missiles ana khaloktsüogo, ta semi-official Mehr news agency-i Honibarnü metetdaktüsü.

Wall Street Journal sangdong ka ajanga ashiba agi, Iran-i iba base nung intermediate-range ballistic missile ana khaloktsü, saka anaprongla khadanga liasü.

Mehr-i ashiba agi, iba base amakba ya tongtibang jenjang ka agiba lir, kechiyong iba ajanga Iran indang missile tem indang range sayur koba taoba mapang tsükchirtemi bilema maliba ka lir.

US-i Middle East-i Marines talila meyirejang aika yokba mapang Israel aser Iran na Honibarnü maneni kati ka maktepogo. Ano tir Donald Trump-i Strait of Hormuz lapoktsüba atema tasümeitetba atema NATO aitsüogo.

Israel-isa Beirut makogo,

aser ashiba agi parnoki Hezbollah pur tamendakdak balala makogo. March 2 nü nungi Iran-i teyari agütsüba Hezbollah telok yagi Israel amak tenzükba sülen Israel-ia anüing ajanga Lebanon kübok tesem balala tali makdar.

U.S. aser Israel nati February 28 nü nungi Iran amak tenzükba sülen nisung 2,000 dak tema tepsetogo aser rara tenzükter hopta pezübubai ayaoka aiba mapang rara tembangtsü asoshi kecha temaitsü mali.

Iran aser kidanger Gulf state tem nung energy infrastructure tem amakba mapang totzü jenjang shilem 50 agi timba kumogo aser iba ajanga alima rongsenketzung amokmerener.

Israel-i Honibarnü ashiba agi, parnoki Tehran, Karaj aser Isfahan yimti densema Iran kübok tesem balala makogo.

Lebanon mamak tsüngda Israel military-i ashiba agi, parnoki Beirut tezülen kiyong tenet nem parnok aliba tesem azüingtettsütsü metetdaktüsü. Israel-i Lebanon amak tenzükba sülen nisung 1000 dak tema tepsetogo aser nisung million ka dak tema pei talidak ki toktsür jenshiaogo.

# Korea nung gari parts yangluba factory ka nung mi adok; nisung 14 asü

**Seoul, Metsüremi/March 21 (Agencies):** South Korea kübok Daejeon yimti nung gari indang parts yangluba factory ka nung mi adokba sülen nisung 14 asü aser nisung 25 kanga mejungi yirua liasü, ta fire department ketdangsurtemi Honibarnü metetdaktüsü.

Mi ya Hokolbar anepdang chichiyongba mapang adok aser aonung 11:48 ako tashi rong liasü, ta safety ministry-i ashi.

Kasa lendong nungsa nisung 35 terara yirua liasü, ta fire ketdangsurtemi ashi.

Parnoki ashiba agi, iba factory ya Anjun Industrial meyong lir aser iba factory nung ya engine valves yanglur aser iba factory ya Hyundai Motor atema supplier ka lir.

Company indang website nung sangdong ka ajanga CEO Sohn Ju-hwan-i tatok meshiogo aser aser ashiba agi, parnoki ketdangsurtem den teka amteper inyaktüsü aser iba lendong atalokba kanga junga bushisüngdangtsü, company indang ?safety systems aser inspections lepa reprangshitsü aser tarutsü nung iba amala

lendong mataloktsü atema tenüngdakba jenjangtem agitsü.

Factory nung mi adokba abentsü aser nisung taküm kümzüksü atema tir Lee ?Jae Myung-i centralised disaster management system ka benoktsü aser takokba tashi resource ajak amshitsü tetuyuba agütsüogo.

Fire department nungi ketdangsurtemi ashiba agi, asürtem rongnung ka mezüngbuba floor nung angu, tanabuba floor nung nisung pezü aser tasembuba floor nung nisung teku sür lia nguteta liasü.

## MULUNGNEN O



**T. Asangla Imchen (Aliba)**  
17.12.1946 - 12.03.2026

"Temolung zürepa aliba mapang, Tsüngrem temeim taochi nung tashi lir aser anisüngzüker"

Temeim Ala - La tamang sarasadem aser sayubentsüji ozü jenokdak liasü. La akumli wadang tembanger aliba mapang nung, kija, kibong aser lokti balala - Arogo, Yimten, Kiyonger, Medemmer, aser Kinunger kwi kati ozü mangyimba khüret nungita yariogo, nenok ajak dang pelaba lemsateper. Nenok sarasadem, nübu, rongsen, aser tesüngzüksü O ajanga onok temulung süngzükdaktüsüogo.

Tsüngremi nenok ajak maneni moajangma!

**Temeim Chirnur, Semchirtem aser Kinungertem**

**ALI AYOKER**

**AT NIHOTO VILLAGE (NEAR 4 LANE) PLOT AVAILABLE @180/- Per Sqft. (Slightly Negotiable) Contact: 9612242850**

# CHRISTIAN HIGHER SECONDARY SCHOOL

NYAMO LOTH ROAD, DIMAPUR - 797112, NAGALAND

E-mail: christian.dimapur@gmail.com

Website: www.chssdimapur.in

*We design your child's future*  
IN LOVE AND



*We build your child's career*  
TRUTH WE STRIVE

**LIMITED SEATS**



**ADMISSION FORMS & PROSPECTUS**

**FOR CLASS II (ARTS & COMMERCE) 2026-27 FOR BOYS & GIRLS AVAILABLE AT THE SCHOOL OFFICE DURING OFFICE HOURS (9:00 am - 1:00 pm)**

### SPECIAL FEATURES

1. Qualified, Trained & Dedicated Teachers
1. Summer Bible School
2. Scripture Retreat & Counseling
3. Career Guidance Cell
4. Smart Board Classrooms
5. Hostel for Boys
6. Basket Ball Coaching (Affiliated with DBA)
7. Cricket Training (Affiliated with NCA)
8. NCC
9. Club Activities

# Miami Open: Alcaraz, Sabalenka nati takok nguogo



**Metsüremi/March 21, 2026**

**(Agencies):** Hokolbarnü Miami Open nung Carlos Alcaraz-i Brazil nunger asayar Joao Fonseca 6-4, 6-4 agi koka tasembuba round tongtetogo.

Arishi küm 22 tain Spain nung asayar yagi set anaprongla tetenzüklen Fonseca indang serve break asü aser break points asemprongla kümzükteta asaya.

"Ni tetenzük nungi tatabangbuba ball tashi kanga junga asayaogo," ta Alcaraz-i ashi.

"Ni Joao ya koda tajung aji meteta lir aser point ajak aser shot asayba ajak atema kanga rangloker asaya liasü," ta paisa shisem.

Tetsürtem rongnung world number one asayar Aryna Sabalenka-i America tsür Ann Li 7-6 (7/5), 6-4 agi koka la

indang Miami title defend asü tenzükogo.

Asaya nung Sabalenka-i mezüngbuba set ya ghonda ka dak tema nungang koka liasü. La 4-1 agi tejakdang liasü saka game tibuba nung break point tenet tashi magiteti liasü.

Kasa asayamung tetsür kija asaya nungsa Australian Open champion Elena Rybakina, fourth-seeded America tsür Coco Gauff aser sixth-seeded külem America tsür Amanda Anisimova nung aser ajak tasembuba round-i iogo.

Kazakhstan tsür Rybakina, shibai Melbourne nung final asaya nung Sabalenka akok saka Indian Wells final nungbo world number one asayar ya mekoki liasü, lai külem Kazakhstan tsür Yulia Putintseva 6-3, 6-3 agi kokogo.

French Open champion

Gauff-ia asaya set ka mekoki aliba nungi meyipa tur Elisabetta Cocciaretto 3-6, 6-4, 6-3 agi kokogo. Iba asaya ya tzünglu aruba ajanga ghonda ishika masayateti liasü.

Mannei Anisimova-ia Australia tsür Ajla Tomljanovic 6-1, 5-7, 6-4 agi kokogo.

Indian Wells nung tasembuba round nung teka tabelen yirua asaya tembanga masayateti tuguba sülen Gauff asoshi iba ya mezüngbuba asaya liasü.

Gauff-i ashiba agi, la yirur aliba tajungba kümdar.

"Court nung tashiba khenkhenbo meteter, saka anogo ka nung ka ta tashiba tajemba küma odar," ta Gauff-i ashi.

Tebur kija asaya tanga ka nung America nung Ethan Quinn-i Norway nung 11th-seeded asayar Casper Ruud 6-4, 7-6 (9/7) agi kokogo. Pai tanabuba set nung set point tenet kümzüka liasü.

Japan nung wildcard anguba asayar Rei Sakamoto-i ATP nung mezüngbuba asaya kokogo. Pai mezüngbuba round nung 6-4, 3-6, 7-6 (9/7) agi Aleksandar Kovacevic koka liasü.

Arishi küm 19 tain asayar ya taruba asaya nung Indian Wells finalist Medvedev den asayatsü.

# Senegal-i AFCON takok marok military base-i bener ao

**Metsüremi/March 21, 2026**

**(Agencies):** AFCON asayamung akokba CAF-i Morocco nem agütsüba sülen Africa champions Senegal puri title defence kanga süoki ia agiogo. Rabat nung Morocco den final asayaba mapang parnoki ground toktsür aoba sülen parnoki iba asaya ya toktsüatok ta shia parnok ket nungi takok konang agina liasü.

CAF-i iba telemtetba agiba sülen Senegal head coach Pape Thiaw-i takok marok ya Dakar nung military base-i benerogo, koba CAF ketdangsurtem nem osang ka agütsüba ama angateter, shirnoki takok marok ya parnok ket nungi bener aotsü merangdar.

Senegal puri asaya matem tsüingda referee telemtetba anema ground toktsür ao aser mapang tatsüka lir meyipa arua asaya-a asaya goal 1-0 agi koka liasü.

Confederation of African Football (CAF)-i ashiba agi, Senegal-i asaya tom nung ground toktsür aoba sülen parnoki asaya nung masayatsü telemtetba agi ta

appeals committee-i ngutetogo aser parnoki asaya goal 1-0 agi akokba ya goal 3-0 agi makokba ka kümogo.

Asayamung regulation ocet 28 nung, "team kati asaya nungi atsüingnra mesüra asayai marura mesüra asayatsü memulungra mesüra mapang matem tsüingda referee nungi temelaba magi ground toktsür ora parnoki asaya makok ta züngshitsü aser parnok tetoktepba nungi tsükdaktsütsü," ta shia lir.

January ita Rabat nung final asayadang mapang apuloktsür asayaba mapang Morocco nem penalty ka agütsüba sülen Senegal nung asayatem ya coach Pape Thiaw-i anir ground toktsür ao aser iba ajanga fan tem ground telungi nongoka aita liasü.

Asaya tenzükshiba sülen Morocco forward Brahim Diaz-i penalty metsü saka goalkeeper Edouard Mendy-i nokdanga liasü. Iba sülen Senegal-i asaya tatemtsü lia goal ka idakja parnoki iba asayamung koka liasü.

# World Cup Playoff atema Italy team nung Chiesa züngoksemogo

**Metsüremi/March 21, 2026**

**(Agencies):** 2026 World Cup qualifying playoffs masaya tsüingda Federico Chiesa Italy national football team squad nung züngoksemogo. Ajisiüka Guglielmo Vicario bo surgery agitsü aliba ajanga masayatetsüsa kümogo.

Head coach Gennaro Gattuso-i, March 26 nü Bergamo nung Northern Ireland national football team den playoff asayatsü atema asayar 28 tenüing sangdongogo. Italy-i iba asaya ya kokra parnok Wales national football team mesüra Bosnia and Herzegovina national football team den March 31 nü asayatsü aser iba asaya kokra parnok United States, Canada, aser Mexico nung 2026 FIFA World Cup asayatsü maongka angutsü. Parnoki takok mongutetra Italy team tang agi tasembuba World Cup nung masayatsü.

Gattuso-i Atalanta defender Giorgio Scalvini-a anisemogo, shiba 2024 küm Euro masaya tsüingda temekok kanga mejungi yirua liasü. Roma midfielder Niccolò Pisilli-a 2024 küm sülen tang mezüngbuba squad nung züngoksemogo aser Cagliari defender Marco Palestra-a tang mezüngbuba senior team nungi asayatsü atema jaokogo.

Chiesa, shiba 2021 küm Euro akokba Italy tem nung dena liasü, pa 2024 küm Euro sülen nungi national team nung khen danga asaya mali.

Kasa mapang nung Igor Tudor-i, Vicario ya temang nung timtem liaka Tottenham Hotspur

pur Deobarnü Nottingham Forest den asayatsü aliba asaya nung asayatsü aser international break mapang hernia surgery agitsü ta metetdaksüogo.

Vicario ya linük team nungi tatemsa November ita World Cup qualifying nung Moldova national football team goal 2-0 agi akokba asaya nung asaya liasü. Iba sülen anogo ishika lir Milan nung Norway national football team goal 4-1 agi makokba asaya nungbo masaya.

## Italy Squad:

**Goalkeepers:** Elia Caprile (Cagliari), Marco Carnesecchi (Atalanta), Gianluigi Donnarumma (Manchester City), Alex Meret (Napoli)

**Defenders:** Alessandro Bastoni (Inter), Alessandro Buongiorno (Napoli), Riccardo Calafiori (Arsenal), Andrea Cambiaso (Juventus), Diego Coppola (Paris FC), Federico Dimarco (Inter), Federico Gatti (Juventus), Gianluca Mancini (Roma), Marco Palestra (Cagliari), Giorgio Scalvini (Atalanta), Leonardo Spinazzola (Napoli)

**Midfielders:** Niccolò Barella (Inter), Bryan Cristante (Roma), Davide Frattesi (Inter), Manuel Locatelli (Juventus), Niccolò Pisilli (Roma), Sandro Tonali (Newcastle United)

**Forwards:** Federico Chiesa (Liverpool), Francesco Pio Esposito (Inter), Moise Kean (Fiorentina), Matteo Politano (Napoli), Giacomo Raspadori (Atalanta), Mateo Retegui (Al-Qadsiah), Gianluca Scamacca (Atalanta).

## STATE OSANG :

Tapak 1 nungi...

# NSCN/GPRN 46 buba Naga Republic...

Naga nung yimden tebilemtsü koma sür latettsü ta asüba tangatetba nung masü, saka pei jenjang koma sür ajangzüksü ta asüba nung inyaker aika lir, iyongji ochi jembitsü amatoker aser tanü asenok melungjembaji iba ajanga lir. Asenok meputep sür India nungeri asen koda akümtsübutsuba? ta paisa asüingdanga ashi.

Asenok nüchiso jenjang ka mangu tashi solution kisüing jagi majungtsü, solution jagi tang aliba telungpur teloktem dang ajangzüksü saka tanüingba lanurtembo kecha tajangzük mangutsü. Asenok India kübok ali tashi state nung kechi lir, ibaji dang angutsü. Saka kodang nüchiso linük ka kümdir, yangji tajangzük aser temoatsü aika sentaka lir, saka asenok India kübok ali tashibo tebilemtsütemji yamai dang alitsü, ta pai ashi.

Alima nung nüchiso anguba linüktemji reprangdangra Nagaland dang tilaba linük-a karbo lir aser parnok jangratema liyonga odar, tip külen, asenokbo nüchiso angutsü teimla maliba indang dang Naga nung tashi-temeteter aikadi jembir, saka asenoka nüchiso ngura tangar amaji jangratema alitsüsa mapangi bener arutsütsü, ibaji asenoki angatetsüla, ta paisa linük kar

medemdanga ashi.

India sarkar den yangluba "Framework Agreement" asüyongja mesüra "Agreed Position" asüyongja state jenjang dang asütsü. Saka asen tsüraburtemi asenok dang Naga nung nüchiso angutsü temeten lir ta shiyonga aru, saka tanübo asenok nükjidong aia aor, anungji, asenok nüchiso bushiba nungi t e z ü m e t a n g d a k t s ü i

ajungshidaktsünür, ta paisa mepishia metetdaksü.

Asenok India kübok dang ali nungbo asenoki amangba tamang yimsü ya-a samatoktsü, joko tesamar masü na? Tanü political party aika Tsüngrem dang masü saka nisung apudakba angur, meilongi yimmakertemi Khristan yimsü amadaktsütsü merangtsü, ta ashi. Naga nung maitsü (identity), yimden (political) temeten, libuyimpur (indigenous) temeten, itemji angateta wazüka ayutsüla, aji mesüra tamangba yimsüjia wazüka meyutetsüsa tensai arutsü, ta paisa tekümdangtsü olen ka lemsatop.

Iba sentong nung Ato Kilonser, Starson Lamkang-ia mapang tatsüka agidang, iba NSCN/GPRN-i tanga mera magidang, tamasa telungpur aser temapur ajak ka küma lungjemtsü meranger, iyongji "Framework Agreement" aser "Agreed Position" kecha nunga medeni lir, anungji, mezüngbuba

Naga nung lungjemba sülen dang Naga nungeri mulungba nung aotsü tangatetba nung lir, ta metetdaksü. Tesüiba mapang nungi Naga nung maitsü aser yimden temeten kümzüka ayutsü atema dang inyaka aru, tanüa yangji dang noktaka lir aser tarutsü nunga yamaji dang aotsü tangatetba lir, ta paisa shisem.

Iba sentong nung Cabinet Secretary, Repento Aye menden aser Kilo Secretary, Uketo Chophy tezülür liasü. Political Advisory Board Convener, Moses Sangtam-i tarur pela-a agizük, Jt. Secretary H.O.D to Keeya, Hiketo Kiho Swu-i jenjang (rank) balala anguba osang metetdaksü. Ano Naga Students' Federation aser All Sumi Students' Union (SKK) nungia meyongertemi o tatsütsü jembi aser Kilonser Border Affairs, Hukheshe Kiba-i tepela o lemsatop. People's Army, Kr. Keneisenueo Sorhie, Yehemi Village Cultural Troops parnoki ken aser yar tsüingsang balala ajanga tesentepertem saksalemdaktsü. Surumi Baptist Church (SBAK Nito Mount) Pastor, Mughalu Swu-i temoatsü meshia sarasademer iba sentong tenzük aser Surumi Baptist Church (SBAK Aizuto) Pastor, Dr. Ighato Chophy den tenüingsang agütsür sentong tembang.

## BILEMDANGANG

"Na arishirtem ajak nü sülen lir ta angatetang."